



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tir_yimyim

tir yimyim TAPAK 8



Biden-i Israel dangi sen \$8bn jenjang hadir yoktsü sentong lir



Naomi Osaka yirur masayatetsüsa aküm

VOL. XXII ISSUE NO. 82 (ADOK 82) DIMAPUR TENTONÜ (MONDAY) AENJETI (JANUARY) 06, 2025 ₹ 5.00

Centre-i tanü NE nung Rs 50 crore indang fisheries sector schemes tenzüktsütsü

New Delhi, January 5, 2025 (Agencies): Union Minister Rajiv Ranjan Singh-i Hombarnü Northeastern Region nung fisheries sector ajungkettsü atema Rs 50 crore mapatong balala tenzüktsütsü.

Centre-i Northeastern Region nung fisheries sector ajungkettsü sentong nung shilem ka ama Union Minister-i Pradhan Mantri Matsya Sampada Yojana (PMMSY) kübok mapatong aika tenzüktsütsü aser aika atema lung azünga yutsütsü.

January 6, 2025 nü Guwahati nung sentong ka agidang Northeast Region nung fisheries beneficiaries nem kulikakettem agütsütsü.

Iba sentong nungsa NFDP registration certificates, KCC cards, aser Best FFPOs and Fisheries Startups awards agütsütsü.

Centre sorkar kübok Department of Fisheries-isa Sikkim nung Soreng district kübok Organic Fisheries Cluster indang sangdong ka agütsütsü. Iba ya Sikkim nung fisheries aser aquaculture renloktsü atema lir.

Pradhan Mantri Matsya Sampada Yojana mapa meyipa repringshiba senden nung mendenji Union Minister of Fisheries, Animal Husbandry & Dairying Rajiv Ranjan Singh asütsü.

Northeast state tem nungi

Fisheries Minister tem den tongti ketdangsurtem iba senden nung adentsü.

Iba senden ajanga Northeastern Region (NER) nung fisheries aser aquaculture renloktsü atema tebilembatem lemsatepsü. Iba senden ajanga Northeast nung ajuruba tayongzükbatem metettsü, inyaka aotsü lenmangtem lemsatepsü aser tesem den apet mapa inyakba ajungkettsü.

Sentong nungsa Deputy Director General, ICAR (Fisheries) Dr J.K. Jena-i "Issues and Challenges in Fisheries & Aquaculture in the Northeastern Region (NER)" ta ser technical session ka agütsü.

Indian fisheries and aquaculture sector ya kanga dang tongtipang sector ka lir aser iba ajanga fishers & farmers crore 3 shi ka nem teyari agütsür. 2019 nungi Ministry aser Department of Fisheries balaka amenokba ajanga iba mera agiba ajanga fisheries sector nung temulung agütsür aser 2015 nungi Rs 38,572 crore tashi endokogo.

Northeastern Region (NER) nung aquatic biodiversity aser water resources kanga tajung lir aser iba ajanga rongsenketzung renlokba dang masü saka food security agütsütsü aser nisungtem tajangzük angutsü.

NEHU kaketshirtemi Centre dang mepishir

Shillong, January 5, 2025 (Agencies): Kaketshir teloktemi Centre dang North Eastern Hill University (NEHU) ken o atema mapa inyaksü ayongzükogo.

North Eastern Hill University Students' Union (NEHUSU) aser Khasi Students' Union (KSU) NEHU unit ajanga Centre dangi shidi ka zülu.

November 14, 2024 nü Ministry ajanga tentetba ludeni university semdangogo aser kaketshir teloktem dang nungi Vice-Chancellor Prof. P.S. Shukla-i tim mesüi inyakba kulitem nguogo, ta kaketshir teloktemi Union Education Minister Dharmendra Pradhan dangi züluba shidi nung shia lir.

Iba luden Chairman-i November 28, 2024 nü züluba shidi nung ashiba agi parnok nem osang tembanga renemtsü atema anogo 15 agütsüba shia lir. Ajisüaka January 4, 2025 tashi nung iba report indang osang kecha mali ta kaketshirtemi ashi.

Iba atema onoki tebilemstü abener anungji Union Minister Pradhan-i telangzüba ka agütsütsü aser ludeni bushitetba nung ajemdaker mapa inyaksü ayongzükger ta kaketshirtemisa metetdaksüogo.

"Prof. Shukla-i ketdangsä arudang tim masüba aser tashimaitba aika lir aser iba ajanga NEHU ketdangsubaren nung tarak kettsüogo anungji pa tangsa mapa nungi agientsüla" ta NEHUSU General Secretary Tonih Kharsati-i shidi nung shia lir.

Prof. Shukla lenisüba nung temulung malemer aser tamang makar anungji pai tetuyuba agütsüba sülen manidaksü ta kaketshir teloktemisa ashi.

NEHU telungi Prof. Shukla maitdaksütsü kechiyong pa aliba ya reju atema lendong lir. Anungji NEHU timi ketdangsä aotsü atema mapa inyaksü mepishir ta kaketshirtemisa Union Minister Pradhan dang shiogo.

Mizoram-Myanmar arrtsülen 'border pass system' tenzükger



Mizoram kübok Zokhawthar nung India aser Myanmar tsüngda arrtsütepa apu noksa nung angur.

Aizawl, January 5, 2025 (Agencies): Manipur sülen Mizoram-Myanmar arrtsü anatsülen kilometer 10 telongtet nung alirtem senzügenbongba mita repringtsü.

Ministry of Home Affairs (MHA)-i Free Movement Regime (FMR) agienba sülen iba scheme tasen tenzükogo. FMR ajanga India-Myanmar arrtsü anatsülen kilometer 16 telongtet nung alirtem passport mesüra visa medeni senzügenbongtsü melaa liasü.

Arrtsü anasa India aser Myanmar nung kilometer 10 telongtet nung alirtemi border pass ka nungdaksü aser ibaji anogo tenetnü tashi atema asütsü ta Mizoram Home Department ketdangsur kati ashi.

Linük anaprong nung alirtemi parnok arrtsü anasa kilometre 10 telongtet nung alir ta asüba

border trade affairs, seminars mesüra conferences aser cultural exchange programmes nung adentsü atema dang agütsütsü. Mizoram kübok district 6-Champhai, Siaha, Lawngtlai, Hnahthial, Saitual aser Serchhip ajanga Myanmar kübok Chin state den kilometre 510 agi arrtsütepa lir.

December 24, 2024 nü MHA-isa Manipur Chief Secretary Vineet Joshi dangi shidi ka nung India-Myanmar arrtsü anasa kilometer 10 telongtet nung alir Myanmar nung asoshi border pass system ka tenzükba osang metetdaksa liasü.

Senzügenbongertemi identity aser residence indang kuli sayutsüla aser arrtsü anasa kilometer 10 telongtet atema dang pass agütsütsü ta MHA-i ashi.

Assam Rifles nungi teshimtet ketdangsurtemi agütsüba 'Border Pass' alirtem dang designated crossing points 43 ajanga senzüdaksütsü ta MHA-isa Manipur Chief Secretary dang shiogo.

Manipur-i international border ajanga Myanmar nung 26 yok

Imphal, January 5, 2025 (Agencies): Manipur arrtsü adena India telungi aitba Myanmar nung 26 tashi Deobarnü meyipa yokogo.

Myanmar nungertem ya rara nungi jena aruba liasü aser Manipur sorkari parnok anisüngzüka lidaksüba aser anepaluba sülen parnok linüki

meypa yokogo. Manipur nung ozünga alema arurtem melidaksütsü aser immigration laws sülen anidaksü ta sorkar ketdangsurtemi nenshia metetdaksüogo.

Bangdakpurtem den yaritepa deportation process timi dang inyakogo ta ketdangsurtemisa ashi.

Manipur nung mokdang agienba sülen truck 400 tema apusoa ogo



CoTU züngsemtemi Kangpokpi district nung National Highway 102 noktanga ayuba angur.

Imphal, January 5, 2025 (Agencies): Assam aser Nagaland nungi Imphal tsütsü aoba gari 400 tema len tom nung anendena aliba Deobarnü apusoa ogo.

Kangpokpi district nung National Highway 102 nung tesem ana nung khu abenba garitem anendena liasü.

Kuki-Zo telok Committee on Tribal Unity (CoTU)-i January 1 nungi NH-102 nung rongsenketzung mokdang tenzükba agienba sülen khu abenba garitem apusoa ogo.

Kangpokpi district nung

security forces talila mapa lemzüktsüba anema CoTU-i lungkak aittsü tenzükba liasü. Ajisüaka January 5 anepdang 2:00 ako nungi parnoki mokdang agienogo.

Kangpokpi district nung Kuki-Zo nung teimba ser alidak nungi ghonda 48 tsüngda additional central forces magienra tuluba lungkak aittsü ta CoTU-i metetdaksüogo.

Naga People's Organisation (NPO) Senapati district-i National Highway 102 memokdangtsü mepishiba tashi angaa CoTU-i

mokdang agienogo. CoTU-i inyakba mapatem ajanga Senapati district nung Naga nung nem timtem magütsütsüla ta NPO-i sangdong ka agütsü.

Külen, All Manipur Road Transport Drivers' aser Motor Workers' Union temi sangdong ka nung truck gari aika nung alo, piyaz, ango, entsü aser chiyungtsütem bena lir ta ashi.

Lenmang mokdangba ya magienra chiyungtsü aika raksa endoktsüsa akümtsü ta Union temisa metetdaksa liasü.

Dibrugarh nung taila ULFA (I) züngsem pezü apu



Nisung pezü ULFA (I) züngsem ama Duliajan area nung senzüa aliba Hokulbarnü apu.

Nirmal Ghosh-i Honibar nikon dang osangbener dang ashi.

"Iba operation mapang onoki 7.65 pistol ka, injang ka, mobile handsets 11, SIM cards 18, IED ka, battery ka aser sen 49,500 parnok ket nungi ngutet. Item nisungtem ya mapa tamajung inyakba ya tang tasen masü aser parnoki tashiyim amshia senotsü

Dibrugarh, Aenjeti/January 05 (Agencies): Assam anüdoklen Dibrugarh district kübok Duliajan nung ULFA (I) züngsem ama tashiyim amshia senotsü meshia jaja aliba nisung pezü Hokulbarnü operation ka nung apu.

Pua alirtem ya Bitupon Gogoi alias Jayanta Asom, Bharat Hazari, Bolin Gogoi, aser Binod Pahari ta

jangjaogo. "Item nisungtemi Duliajan area nung shishilempar asem nem senotsü meshia tezüluba agütsür liasü. Duliajan police station kübok onoki ken o ka benokogo aser bushisüngdang tenzük. Ibaji ajanga tashiyim amshia senotsü meshitsü mechi ULFA (I) tenüng amshir par pezü ya takok ngua apu," ta Dibrugarh ASP(HQ)

meshitsü atema ULFA(I) tenüng amshia liasü," ta Ghosh-i ashi. "Parnoki Duliajan nung Republic Day mapang IED ya pokdaksütsü sentong liasü. Parnok ya shidakba ULFA (I) den tesendaktep mali. Ajisüaka parnok ya mapa tamajung inyakertem lir aser Assam kübok police station balala nung parnok anema ken o balala benoka lir," ta paisa ashi.

Assam police constable ka pa sasa khaset

Dibrugarh, Aenjeti/January 05 (Agencies): Dibrugarh nung Assam police constable ka aibelena pa sasa pa dak injang agi akhaba sülen Honibarnü iba zübu agi asü.

Iba nisungba ya Constable Madhab Chutia ta jangjaogo aser pa Dibrugarh Additional Superintendent of Police (ASP) indang Personal Security Officer (PSO) inyaka liasü, ta police-i ashir.

Constable Chutia ya par kidang pa indang service AK-74 rifle mürekba mapang iba



Constable Madhab Chutia.

Dibrugarh police ketdangsür kati ashi.

Pai aibelena trigger nung tsükshia injang ya pa indang teko nung khaloktsü. Injang ya pa dak nungi reteta adoka par kidang television yua aliba nunga khashi, ta ketdangsüri ashi.

Iba lendong atalokli Constable Chutia ya arsanga temang anepalutsü atema Assam Medical College and Hospital (AMCH) bushia bener ao, saka tia maka pa iba zübu ajanga asü.

Miss Tourism World Finals nung Irene Dkhar-i shilem agitsü



Irene Dkhar

Guwahati, Aenjeti/January 05 (Agencies): Tang Miss Tourism India, Irene Dkhar ya linük tenüng nung Miss Tourism World 2025 Global Finals nung tokteptsü renema lir, koba January 10 nü Guangdong, China nung alitsü.

La New Delhi nungi December 27, 2024 nü ogo aser United States, France, Brazil aser Venezuela linüktem densema alima tesem balala nungi tetokteper 60 den la adentsü, kong Belt and Road Initiative aser Shanghai Cooperation Organization linüktem nungia shilem agitsü.

Iba tetoktepeba ya China sorkari yarir aser ibai global tourism aser cultural exchange temaba jenjangi ajungkettsü nükjidong nung lir.

January 3 nü Guangzhou nung osangbener senden ka nung jembidang Ahmed Mustafa Fahmi (Arab League), Sinisha Belyan (Bosnia and Herzegovina), aser Ivan Chiulu (Zambia) nungeri iba sentong ajanga sobaliba tsütsü tesendaktep nung tongtipang shilem agiba indang shia liasü.

Jaipur nung Miss Tourism India title makokdang Dkhar-i Miss Meghalaya 2022, Miss Northeast 2022, Femina Miss India Meghalaya 2023 aser Miss Grand India Meghalaya 2024 densema konang tetushi aika nguteta liasü.

Lai sapang balala nung takok anguba ajanga Miss Meghalaya Organization nungia kanga sashia yaria lak tamang akar.

Tripura police-i ganja tetong 40,000 raksatsü



Agartala, Aenjeti/January 05 (Agencies): Temesepba mozü lu ayimba anema mera tulu agia Tripura State Rifles (TSR) teyari nung Jatrapur police ajanga South Nidaya Manaititta tesem nung ganja tetong 40,000 shi raksaa indoktsü.

Iba operation ya Jatrapur police station nungi ketdangsür temi anir inyaka arem min nung ozüng alema item süngtong tema aliba nung tenük yoker inyak.

Ibai state nung tang narcotocs aser temesepba mozü shibelenba anema raraba tongpang nung shilem ka lir.

Chief Minister Manik Saha-i iba operation tenüng asang aser state sorkari "Nasha Mukht Tripura" (Drug-Free Tripura) asoshi maneni inyaktsü ta ashi.

Temesepba mozü tebilemstsü koktettsü atema arok-i shilem agitsü kanga tongtipang lir ta pai ashi aser nüburttem dang tetsübotsü, tebilemstsü makaba aser anema aliba state ka kumdaksütsü asoshi yariteptsü ayongzük.

Tripura nung temesepba mozü maliba jenjang kati aitdaksütsü aser temesepba mozü anema nokdaksü atema state sorkari maneni mera tesashi agitsü, ta pai ashi.

Government of India Ministry of Chemicals & Fertilizers Department of Pharmaceuticals

pmbi

JAN AUSHADHI

Brand aliba mozü tem den medemdangra jenjang shilem **50 nungi 80** tsüngta ajemer jenjang talang yong mozü tajung agütsür

14500+ Jan Aushadhi Kendra

2000+ High Quality Medicines

300+ Surgical Equipments

Self Employment atema maongka tajung

Pradhan Mantri Bhartiya Janaushadhi Pariyojana kübok nü meyong Jan Aushadhi Kendra lapokang

Jan Aushadhi Kendra kibur ita shia sen 20,000 tashi teyari angutsü

Jan Aushadhi Kendra komaser lapoktsü metettsü atema QR Code scan süang

Scan QR Code

For more information download "Jan Aushadhi Sugam" mobile app

www.janaushadhi.gov.in

National Toll Free Helpline 1800 180 8080

Delhi nung BJP-i takok ngura schemes manentsütsü: PM Modi



January 05, 2025 nü New Delhi nung election nüboyim sentong ka nung Ato kilonser Narendra Modi, Union Minister Manohar Lal, Union Minister of State Harsh Malhotra, Delhi BJP Tir Virendra Sachdeva aser tangartem tangokba noksa nung angur.

New Delhi, Aenjeti/January 05 (Agencies): Amongnü Ato kilonser Narendra Modi-i, Delhi nung BJP-i takok ngua sorkar kümra public welfare scheme kecha manentsütsü saka sorkari item mapatongtem nung ochimashi ajak anentsütsü atema inyaksü, ta metetdaksü.

Delhi kübok Rohini area nung election nüboyim sentong ka nung jembidang Ato kilonseri, Delhi nung Aam Aadmi Party (AAP) sorkari tesüiba küm 10 Centre den raradang mapang ajak süidaksüogo, ta metetdaksü.

Modi-i, AAP sorkar ya linük yimtiba atema lendong, ta shia pai Delhi nung alirtem dang temelenshi bener arutsütsü atema BJP nem maongka agüjang, ta mepishi.

“Lendongji süi oadok nung dang onoki gol ana aketba terenlok bener arutsütsü,” ta pai ashi. Paisa Delhi nung Centre sorkari Metro network ulushitsüba, highways terenlok aser Namu Bharat Regional

Rapid Transit System tenzüksüba metetdaksü.

Delhi nung item ama infrastructures tsütsü terenlok agüjaka yimti nung gari lenmangtem nung ongken lir, kilentzü tema nung ayimer, lenmang nung gari masemer, aser ibaji ajanga tesem kar nungbo auto aser taxi driver temi senzütsü memelunger, ta pai ashi.

“Tesüiba küm 10 tsüngda Delhi nung lendong aketba sorkar ka nguogo. Delhi nung alirtemi laktetogo. Nüburtem ayimdenba ola angashir. Onoki iba ya magizüktetsü, anungji onoki temelenshi bener arutsütsü,” ta pai ashi.

Ato kilonserisa Coronavirus wara mapang Delhi nung nüburtem timtemba; talisa oxygen aser nüngdakba mozü balala agi kanga anüngba metetdaksü.

“Nüburtem timtemba mapang nung AAP sorkari parnok atema ‘tamarener ki’ dang yanglu,” ta pai ashi.

Delhi nung BJP sorkar arura parnoki welfare schemes anentsütsüa akok, ta kari arendakba dak sendakba nung pai, BJP-i welfare schemes kecha manentsütsü saka tajungba dang benoka inyakba den külemi Central schemes nung rangloker inyaksü, ta metetdaksü.

“AAP sorkar yimsüsüba kübok Delhi nung timtem ka nungi ka, ta ajangshiogo: tzü agi anüngba, kilentsü aodak mokdangba, mopung menenba aser lendong balala ajanga tsübua liasü. Delhi nung kodang AAP agiendir iba mapang nungjagi ang gol ana aketba sorkar terenlok aser yimsüsüba tajung kübok renloktsü,” ta pai ashi.

Taoba Lok Sabha election nung ama Delhi nung alirtemi taruba assembly election nung BJP yaritsü imlar, ta shia pai, “Delhi ya terenlok aser azükaru aliba yimti ka kümdaksütsü atema tang mapang ya maongka tajung,” ta pai ashi.

Gujarat kübok Porbandar nung ICG chopper tsükok; nisung 3 asü

Ahmedabad, January 05 (Agencies): Amongnü nikongdang Gujarat kübok Porbandar airport nung Indian Coast Guard (ICG) indang Advanced Light Helicopter (ALH) ka tsükokba lendong nung yangji mena alir nisung asemprong süogo.

Iba lendong ya nikongdang 12:10 ako meta atalok, ta police aser Coast Guard ketdangsertemi metetdaksü. Osang angashiba agi,

helicopter nungji ICG sepaitem training agiba mapang nung tayimtsü nung technical timtem adoka tsükok.

Iba lendong nungji pilot ana densema nisung asem asü.

Chopper nung mena alir nisung asempronglaji ilonga Porbandar nung aliba hospital kati anir oa yari, ajisüaka meküzmükteti asü, ta Kamala Baug police station nung Inspector, Rajesh Kanmiya-i

metetdaksü.

ALH chopper ya Hindustan Aeronautics Limited (HAL)-i yanglur. Iba chopper aika tsükokba sülen yaküm iba chopper ya mapang tatsüka mamshidaksü liasü.

Ita ka tejaklen-a Porbandar anasa Arabian tzüyim nung ALH helicopter ka tsükoka liasü. Iba tatalokba sülen Coast Guard-i ALH choppers ajak reprangshitsü tuyua liasü.



January 05, 2025 nü Porbandar airport anasa Indian Coast Guard (ICG) indang helicopter ka tsükokba sülen küzmükba maparen inyakdang tangokba noksa nung angur.

Shisaliok tajung agütsütsüji sorkar teinyaksü mapa lir: Rahul Gandhi

New Delhi, January 05 (Agencies): Shisaliok tajungji privatisation aser financial incentives ajanga magütsütetsü; sorkari shisaliok atema senotsü tali indoktsüla aser sorkar rejutem tashi itshidaksütsüla, ta Congress lenir Rahul Gandhi-i ashi.

Tawa IIT Madras nung kaketshirtem den jembidang Lok Sabha nung Opposition lenir, Rahul Gandhi-i tongtibang onük aika nung pa tebilemba lemsatepa liasü.

“Nüburtem nem shisaliok tajung agütsütsüji sorkar atema tongtibang teinyaksütem rongnung ka lir. Shisaliok tajungji privatisation aser financial incentives ajanga magütsütetsü,” ta pai ashi.

“Asenoki shisaliok atema senotsü tali indoktsü nüngdak aser sorkar rejutem tashi itshidaksütsü nüngdak,” ta pai X ajanga metetdaksüba den külemi pai kaketshirtem den jembiba video ka lemsatep.

“Akhidang nungi inyaka aruba mapatem dak alia tanga lenmangtem bushitsü atema kaketshirtem nem tashi agütsütsü, tasen purapiteta inyaksü aser parnok tejangraba inyakdaksütsü atema onoki shisa lemsatepa liasü,” ta pai lemsatep.

Temaba shisaliok ajungkettsü dak sendakba nung tasüngdangba ka langzüdang

pai, linük kati nüburtem nem shisaliok tajung agütsütsüla, ta ashi.

“Asen nüburtem nem shisaliok tajung agütsütsü atema lenmang tajungtibaji ajak privatise asüba ya masü, ta ni bilemer. Iba maparen nung financial incentives züngokra ibaji ajanga atangji shisaliok tajung agütsür masü. Asen linük nung reju tajungtibatemji sorkar rejutem lir, aser item reju rongnung nenok (IIT Madras) densema lir. Sorkartemi shisaliok atema ano senotsü taliba indoktsüla,” ta paisa ashi.

“Tang asen linük nung shisaliok inyakyim nung timtem tulu lir. Asen shisaliok inyakyim ajanga asen chirnurtem mangdang ataloktsü atema temelaba magütsür ta ni bilemer.

Gandhi-i, pai Kanyakumari nungi Kashmir tashi ‘Bharat Jodo Yatra’ agidang tanur meyirjang aika den jembioogo aser parnok nükjidong asüngdangogo, ta ashi.

Parnoki lawyer, doctor, engineer mesüra sepai kümner ta shiogo, ta pai ashi.

Asen linük shisaliok maparen ajanga engineer, doctor mesüra IAS/IPS mesüra sepai aküm nung ang takok anguba ama züngshir, ajisüaka asenoki tanurtem kechi inyaknerar inyakdaksütsü atema melatsüla aser mapa tapu ajak inyakdaksütüla, ta paisa shisem.



January 05, 2025 nü New Delhi nung Aam Aadmi Party (AAP) tongti, Arvind Kejriwal den party lenirtem- Manish Sisodia aser Saurabh Bharadwaj nungeri osangbenertem den jembidang tangokba noksa nung angur.

Chhattisgarh nung police-i Maoists telungpur 4 khaset; police ka asü

Raipur, January 05 (Agencies): Amongnü Chhattisgarh kübok Bastar region nung sepaitem aser Maoists telungpurtem tsüngda khatepdang telungpur pezü khaset aser police-a ka asü, ta police ketdangsertemi metetdaksü.

Iba rara nung District Reserve Guard (DRG) nung head constable ka asü.

Honibar nikongdang security sepaitemi telungpurtem mita aodang Narayanpur aser Dantewada district na tsüngda arrtsülen arem nung khatep tenzüka liasü.

Rara anenba sülen iba tesem nungji Maoists telungpur tasümgang pezü den AK-47 rifle aser self loading rifle (SLR) densema prangpong aika angu, ta ketdangseri metetdaksü. Iba rara nung DRG head

constable, Sannu Karam-a süogo. Chhattisgarh kübok Bastar region nung sepaitem aser police na senteper mapang shia Maoists telungpurtem den rarar. Yaküm October ita nunga Chhattisgarh kübok Narayanpur nung telungpurtemi bomb amshia amakdang Indo-Tibetan Border Police (ITBP) police ana pokseta liasü. Abujhmad nung telungpurtem mita aoba sülen meyipa arudang telungpurtemi lenmang nung Improvised Explosive Device (IED) bomb ka pokdakja liasü.

July ita nung Bijapur district nung telungpurtemi IED bomb ka pokdaksüba lendong nung sepai ana pokseta liasü.

June ita nunga telungpurtemi IED ka pokdaksüba lendong nung Central Reserve Police Force (CRPF) sepai ana pokseta liasü.



TIR YIMYIM

YIMOBILEM (EDITORIAL)

DIMAPUR TENTONÜ, JANUARY (AENJETI) 06, 2025

Aketba wara

Tang ya China nung yimra-manga agi shirangdaksüba wara bolua adokba osang agi asenok dena shisabolutsüsa arür sangoktsüba angashir. Iba tashidak wara dang ya Human Metapneumovirus (HMPV) ta ajar. Küm ana jakdang tasütsü wara tulu Covid-19-a China lima nungi tenzük, anungji China lima nung poktetba tashidak wara, kobasa China nungertemia mekoktet prokshidakltsür, iba tashidak warajibo, atangji, lendong tulu aketba tashidak wara asütsü ta shisabolua bilemer. Ajisüaka, mulung anisungzüksü kaji, Indian Medical Association (IMA) nung mongintemi ashiba agi, iba HMPV tashidak wara yabo Covid-19 wara ama tetsübutükabo masü, ibai yimra manga agi atongba tashidak ka dang lir aser talisa tanur tilatem dakbo ajak dak amai iba timtem yagi atongtsü. Iba tashidak wara agi atongdang akettsü aser neptzübangtsü yima temang metatsü, tokolak angotsü aser temang anibelem tali metettsü. Atangji, tashidak aser mozü nung mongintemi ashiba amaji, iba HMPV tashidak wara ya nisung asütsüsabo mesüaka, iba kasa tashidak wara yagi mekümdanger aser tia majunger dakbo tepokpok nung kongshir aser tango junga mesashitetba tashidak agi shirangdaksür aser tasüa asür. Aji oda, koba tashidak wara südirsüaka yimbazüa toktsüsüla tashidak masü, kechiyong yimra manga agia tashimaitdak tanga temang shilem nung kongshira tashidak tulu kümadoktsü aser tashidak wara tamajung agi menepaka mapang shitak nung anepalura melamelaa jungadoktsü. Iba tangatetba nung asenok nisung shia kümdanga alitsüla aser tang metetdaksüba amaji government-ia tashidak tendangdak aser anepaludak tesem tesem nung lapoker mita atatsüla. Atangji, tang temekong aser takong mapang ya China lima nung dang masü saka asenok Nagaland nunga yimra-manga agi kanga tongtepa shirangtepba mapang ka lir. Ajisüaka, ashiko asenok shirangdaksüba yimra yabo China nunger shirangdaksüba HMPV yimra masü saka auyi achiba 'dust allergy' agi kangshir asütsüa akok, kechiyong asenok, talisa, Dimapur nung alirtembo asen yimti yimdong nung senzüdang teni-tebang nungi atuba auyi agi tepokpok dang masü saka tepin dena sünger kidangi meyipa arua alitsü. Ibaji tali tejangja metettsü asoshi asenok rongnungsa süaka küm piyong bendanglen alima temerük aser tajung nung monger arurtem ajunga amato neptzü bangtzü yima aketa asenoki ajurutsü. Atangji, asenok amonga adena moi pei lima metoktsüi amongertem asoshibo kima yimdong nung auyi chia senzüba aser lishi mélanga jajabaji yimya ka dang, kecha balaka masü, asenok asoshibo auyi malidak senzübajiang balaka, anungji auyi malidak senzü dangang shirangtsüa akok. Iba ama lima ka nung alirtem asoshi tekümdangtsü aser temetettsü kaji, alima nung tashidak wara tasen poktetang tepoktet, tamasayongi meshirangtsüsa kümdanga alitsübaji kanga tongtibang lir. Aji oda, asenok meshirangi alitsüsa asenok alitsübaji asenok dak nungi asenoksasa tenzüksüla. Item teinyaktsütem rongnung tongtibang kaji asen alidak kilong kima dang masü saka yimti yimdong dena kanga junga merüka ayutsü merangteptsüla. Atangji, yimti yimdong nung auyi madoktsüsa inyaktsübajibo government mapa asütsüla. Tangar yimtitem nungbo anepdang shia yimti yimdong kioktsü agi aokba dang masü saka tzü agi dena shitoka angutsü. Ajisüaka, asen lima nungbo yimti yimdong tzü agi shitoktsübaji ano mapang tatsüka agitsü saka kioktsü agidanga jungjunga oker janaona ajak jungjunga bender oa tesem shitak nuung oagi endokra, iba jagi tang asoshibo peritsü. Ibaji bilemdanga Dimapur yimti yimdong , talisa ajak dang tongtibangtiba yimdong NL Road ajanga süidang lenmang tezü anaprongla lishi nungi adokba teshinem agi HMPV tashidak wara dang nungi tamajungba tashidak agi atongtsüsa menemer aser apu ajanga süidangbo lenmang tezü anatsülen lisem nangdenba agi kia süshia nangdena aliba angur. Ano, train station leni aoba lenmangbo tangar dang sayutsüla masü jenjang ka nung asenok seplepdagi. Aji oda, China nungi masü saka asenok len nungiang yimra wara ya China leni aotsüsa asenok aliba tensa tia ya state government-ia aser Municipal purtemia metettsüla.

OLEMSABANG

2025 KÜM ASOSHI KECHI SENTONG REMEMER ???

~ L. Kika Pongener

Tamasa Tir Yimyim azünger ajak dang küm tasen salem metetdaksür. Asenok küm tasen ka nung ayaoker anogo ishika jajaa arudagi. Küm tasen ka nung ayaokdang, nubur ajunga mulongjang nung 2025 küm ya kechi koma ka asütsü (?)...ta tasüngdangba aika asüngdanga alitsü. Atangji, asenok ajaki 2025 küm jagi ozü kibong, ozü yimden, ozü arogo, ozü mungdang, ozü lokti aser ozü sorkar asoshi-a kechi ka renema yuja lir (?)...ta shisadangtsü kangasa tongtipang lir. Kodang asenoki tarutsü nukla aser mangdang yur inyaka aotsü sentong yangludir, idangji tamasa tesuiba mapang inyaka aruba mapatem khen meyipa reprangshitsü kanga tongtipang lir, aser tamakok kar lira kodaser tamakokji angu (?)...ta bushidangtsüla, aser takok ngua inyaka lira, ano iba nungji ajemdaker tarutsü nung tajungtiba inyaktsü asoshi mangdang tuluba ayutsü aser sentong tajung yanglutsü kanga tongtipang lir.

Kibong : Tanü asen Naga nunger kibongtem tia reprangdangra, kibong aika molumi tia nung lir. Kibong nung apuani tsüngda temeim mekongga akümba, tsürabur o chirnur tsüngda tesendaktep raksar kibong aika aiatai tia nung lir. Ano kibong karbo takar jenjang nungi sensak tiai yir, tangar nem ki shibangdaksüba, tangar nem memetetdaksüi jenshia senzüba....Iba amaji ala-ashia aliba angudang kangasa meima repranger. Iba ama tiaji kodaser kong nungi tenzük (?)...ta teraji bushidangra, karbo rongsen timyimi ketdang masüba ajanga aser karbo pei kibong jenjang dak alia libaliroba ajanga adokba asütsü akok. Kinungbur aika yi lar kümer, kinungtsü aser chirnur kong koda alir memeteti taküm lisa-a alir aika lir. Ano kinungtsür aika kinungbur den küsa chia-ajemba, pei kibong jenjang memetet, pei kinungbu jenjang memetet 'Life Style' kanga 'Luxurious Life' nung aliba....Iba amaji tali mashi aliba agi kibong sentsüh agi tsübanger sensak tiai aiba karbo lir. Ano chirnur aika mozular lar/yi lar kümer tsürabur timtemdaksüba, ano chirnur aikati pei tsürabur jenjang masadangi senotsü meshiba aser lalushiponga aliba agi kibong sensak tiai yidaktsüba aika lir. Ano iba dak alaka, tanü LGBTQ+ iba tebilemstsü ya kanga ulura kümogo....Atsü-apong küsa, tebur o tebur na meimtepba aser tetsür o tetsür na meimtepba aser kibong akümba, atsü-apong melentepba....Tetsür agi tebur akümba aser tebur agi tetsür akümba, aser ano tetsür-a masü aser tebur-a masü ta akümba. Ano tanü putu nung Internet, Instagram, Goggle, Facebook, Youtube, Whatsüp etc. yamala nem kibong/taküm anisadaktsüba....Iba amala tebilemstsütem ajanga kibongtem aika tebilemstsü khuret agi tonga lir. Aji oda, kibong mejungra yimden, arogo aser loktiliba aser sorkar dena majungtsü. Anungji taküm 2025 küm ya Naga nunger kibongtem ajunga meyipa reprangshiba aser yanglushiba küm ka sudaktsüdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Taküm-a Pakistan linük nung Khristantem tepset tenzükogo



Suleman Iqbal hospital nung amongdang tangokba noksa nung angur.

January 05, 2025: Pakistan nung Muslim nungertemi Khristan ka khasetogo; Khristan aluyimersangji kanga azükarua aliba agi Muslim nung ali kiburtemi tenükmerem agi pa khaset, ta osang ka ajanga metetdaksü.

2025 küm Pakistan nung mezüng tepsetba Khristanji arrshi küm 25, Suleman Iqbal lir.

Iqbal ya Pakistan nung Punjab Province kübok Gujranwala District nungi lir.

December 29 nü Iqbal aser teno Dawood Iqbal na market nung lia nisung trok motorcycles nung arur tena dak injang khaloktsü.

Iqbal tebu, Iqbal Masih-i, par jabaso dak injang khaloktsürtem rongnung kabo Abdul Rehman

Yaqoob lir, ta metetdaksü.

Masih-i, “Muslim nungertem jagi Suleman dak tebok nung injang khaloktsü aser Dawood tera agi dang kümzük. Tena anasa nokdaka alir Shamraiz Javed-a injang agi temekok yiru,” ta metetdaksü.

Masih-i, idangyongjisa Suleman hospital-i anir oa yari, saka mekümzükteni Bodhbarnü (January 1) asü, ta metetdaksü.

Iqbal-i sorkar li ‘lease’ nung anguba ajanga Yaqoob kanga jashia liasü.

“Suleman-i ali anguba mapang nungi Yaqoob aser par kinüngertemi tenük merema liasü. Parnoki aluyimba osettema raksatsütsü meranga liasü,” ta Masih-i metetdaksü.

Ajisüaka Iqbal Suleman-i

yimjung dang yanglutsü merang aser pa mapa nung dang rangloka liasü, saka anasa aliba Muslim nung ali kiburtemi maneni pa jashidaksütsü merang.

Masih-i, “Suleman ya tesüngjem aser Khristan tajung ka liasü. Ita ishika tejaklen pa kibong aküm, ajisüaka ozüng alema inyakertemi pa kinüngtsü amitsür küm daksüogo aser onok taküm nung tazüngla adokdaksüogo,” ta ashi.

Tang tashi nungbo police-i Yaqoob mapu.

Gujranwala Cantt Police Station nung police ketdangser kati, aibelenertemji aputsü atema tang tebushidak lir aser deputy superintendent of police leniba nung iba ken o bushisüngdangdar, ta metetdaksü.

Khristmas anogo nunga Lahore yimti nung Muslim nungertemi pastor ka kidang Khristan asem dak injang kahalokja liasü.

December 24 nü Muslim nungertemi ainertem amokmerenba mapang nung Pastor Shahzad Siddique-i parnok nokdangtsü meranga liasü, iba sülen anogo ka lir Khristmas anogo nung pastor Shahzad’er kima Khristantem adenshia lia Muslim nungertemi parnok dak injang kahalokja liasü.

Operation World tenzükba sülen küm 60 ajungba mong among

January 05, 2025: Alima nung sarasadem onük balala lemsatepa aruba Khristan melungtet telok, Operation World (OW) tentetba sülen küm 60 jungogo.

Operation World-i küm ishika tsüngda shia sarasadem leniba onüktem sangdonger aser linüktem atema sarasademtsü asoshi Khristantem den lemsatepa arur.

1964 küm mezüng WEC International nungi missionary, Patrick Johnstone-i OW indang sarasadem leniba tapak 32 nung sangdonga liasü aser iba nungji teka agi yangluba map-a densema liasü. Iba manual kaketji South Africa nung Gestetner machine tejen ka amshia menünga liasü, ta tawa OW-i metetdaksü.

Iba sülen 1965 küm Germany nung iba manual kaket tapak tuluba nung adoka liasü.

WEC International nungi missionary aser OW atema researcher, Jason Mandryk-i, “Mangdang yur kanga tongmelang agi dang tenzükba mapa ka tanübo Operation World akümba ya jangratemtsüka lir,” ta ashi.

Jason Mandryk-i, “Ano tesüngmangtsü kaji, iba mapa ya South Africa nung apartheid sorkar aliba mapang nung inyakteta liasü. Africa nung tanak nisung Khristantem aser temesüng (bendanger

missionaries aser South Africa nungertem) nisungtem longjemer külemtettsü, sarasademtettsü aser külemi tenzükba wadang inyaksü nükjidong nung iba maparen ya tenzükba liasü,” ta metetdaksü.

Tangbo OW ministry kübok tanurtem atema edition pezü bendenlokogo aser ‘title’ tasen “The Church is Bigger Than You Think” aser “The Future of the Global Church” bendenlokogo. Tangbo digital format nunga adoker aser free mobile app ka densema lir. OW resources ji oshi 20 nung meyipzüker.

Mandryk-i, OW resources ajanga Khristantem tamang jenjang ainba nung kanga yarir, ta metetdaksü.

“Tamangertem, Arogotem, sarasadem movements, mission organizations aser theological institutions ajanga alima tesem aika nung kongshir. Mission aser ministry balala nungi lenirtemi Operation World ajanga parnok taküm nung kongshia mangdang ulushiba lemsateper,” ta Mandryk-i metetdaksü.

Mandryk aser pa den külemi inyakertemi 1964 küm nungi tenzükba OW indang puti otsütem bushir aser alima nung mission inyaksü atema tongtibang onüktem asadanger.

“1964 küm nungi 2024 tashi nung alima nung Khrista osang

ajanga mayimjemba nütsüng shilem 50 shi aliba nungi tangbo shilem 28 shi dang kümogo. Iba ya tamang agi inyakba aser sarasadem ajanga koktetba kuli lir,” ta Mandryk-i ashi.

1964 küm alima nung Khrista osangtajung agi mayimjemba nütsüng tesadangji (50%) nisung billion 1.67 liasü saka 2024 küm alima nung Khrista osangtajung agi mayimjemba nütsüng shilem 28 ji nisung billion 2.28 lir, ta paisa metetdaksü.

“Tesüiba küm 60 tashi alima nung mission mapa inyakyonga alima nung nisung ajak nem Khrista osangtajung angashidaksütsü atema wadang tulu anüngdaka lir. Alima nung Khrista osangtajung mangashiba nütsüng teimba-teimba dang akümer. Anogo shia nisung 50,000 bendenloker,” ta pai ashi.

Alima nung Khrista osangtajung prokba maparen nung missionary tem atema tetsükdaksü tulutiba mapangtemji Cold War aser Tsüngrem dak mamangba Communism mapang liasü, ta paisa metetdaksü.

“Anüolen lima nung tang tashi nütsüng teimba aliba yimsüji Khristan yimsü lir. Africa, Asia, aser Latin America nungi Khristan lenirtem olaji tang ang angashi tenzüker,” ta pai ashi.

ANOGO ABEN TSÜNGREM DEN

Takok Agütsüba. Matt. 6:5-15

Khristan shia nükjidongji Yisu mesüka alitsübaji asütsüla. Yisu dak aliba jakla tajung ajakji taidok agütsübaji liasü. Yisui temulungjang ajunga agi chichiba taidok agütsüba ama nisung shinga melika.

Asenoki Yisu mesüka linüra Yisu ama tatok agütsüba tashiji ululoka alitsü bushitsüla. Pa alima nung taküm tembanga arudang mepelai bilemba aser tesempa nungi nüji süa liasü. Asenok meimchir tesendaktep nung timtemji asenoki sadoksadoka temulungjang ajak agi taidok magütsütetba aser mulunga maliba ajanga timtem adokdaksür. Khrista dak amanger ka ama tamajunger dang Pai inyakba ama asenokia taidok agütsütsü angazüktsü Tsüngremi yariang.

Khristai taidok agütsüba shidakbaji kechi ta süngmangtsüa kar. Yangi teyari kuli ka agütsür: Taidok agütsüba tashiji nai kar dang mejungi inyaksü bilema alidang, shibai anema nai tamajung inyaksü bilema liasü pa/la nem taidok agütsütsü tashi Tsüngremi agütsür. Anungji ibai Tsüngremi agütsüba tashi ta angatetsü. Aiben tatok agütsütsübaji shibai agütsür aser shibai agizüker anaprongla atema tasak. Aji saka yirua aliba nüji akümtsü asoshi tatok agütsübaji dang leman lir.

Item ya shisadangang: Ni taidok agütsütsü aser amadoktsü tashiji lir ma? Ni bilemetetaka taidok agütsütsü tashi ulushia lir ma? Ni tatok magütsütetba nisung kar lir ma? Shiba ni anema mejungi inyak pa dang taidok agütsütsü kechiba ni ratamatar ?

Ni Kibuba na kümzükba, aser na alangzükba ta nai metetsü. Isa. 60:16.

Yemen nung Khristan tetsür ka nem tasüba temerenshi agütsütsü



Nimisha Priya

January 05, 2025: Yemen nung tanur tetsü Khristan obendang agüja liasü aser tang la nem tasüba temerenshi agütsütsü temelaba agütsüogo; lar kinüngertemi la kümzüktsü merangdar.

India tsür Khristan arrshi küm 34, Nimisha Priya ya nurse kar lir; la indang business partner, Talal Abdo Mahdi tepsetba ken o nung la nem tai tonglokja liasü.

Tan hopta Houthis’ Supreme Political Council nung Tir, Mahdi al-Mashat-i la nem tasüba temerenshi agütsütsü atema temelaba agütsüogo.

Yemen nung Sharia ozüng kübok Nimisha taküm kümzüktsü atema joko lenmang ka dang lir; azü meyong sen agüja asür kibong dang nungi tatok angu nung ang la taküm kümzüktsü.

Yemen nung meimchir temeden atema inyaker, Samuel Jerome-i, la taküm kümzüktsüji Mahdi’er kibong dak dang keta lir, ta metetdaksü.

Nimisha Priya arrshi küm 19 dang asüadang nurse inyaksü atema Yemen-i oa liasü, aser la kinüngbu den jala nata Yemen-i anir aotsü sentong liasü.

Tamalen lai, “Mahdi-i kü sen aser passport auya aser prangpong amshia ni amokmerena liasü. Mahdi-i ni reshikangshia aruogo,” ta metetdakja liasü.

2017 küm Mahdi tasü mang anguba sülen Nimisha nem tai tonglokja liasü.

Nimisha tetsü Yemen-i oa Mahdi’er kibong ajurua tatok meshitsü tebilemba lir. Lar kibongi Khristantem dang la atema sarasademjang ta mepishia metetdaksüogo.

AO OSHI ANGAZÜKDAK:

TANÜ ANGAZÜKTSÜBA OJANG

Tayi

(n) osettsüset nung teka ametdak (handle)
* Asenoki au marok nung tayi keta yanglur.

Tayi

(adj) tzü agi metenba (wet)
* Sü tayi anü nung apur.

Tayi

(n) ak tepong (male pig,boar)
* Benjong mapang ak tayi teimba tepseter.



Tir Yimyim

OLONG PAITEP # 7025

Grid for OLONG PAITEP # 7025 with numbers 1-16 in various cells.

TIPILEN

- 1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzük asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7024 TELANGZÜBA

TIPILEN :

- 1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kiochtsü, 17. Itsük,
18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi,
8. Lah, 9. Jangkok, 12. Akok,
14. Nashi, 16. Sür.

NAI-A YA METETTER MA



December 31, 2024 (New Year's Eve) nung North Dakota kübok Hettinger County Fairgrounds, Mott nung Garisson Risner den Pegasus Illuminations ajanga world record ka yangluogo. Parnoki 12 sixteen-inch shells pokdaktsüba ajanga otsü tasen yanglua liasü.

Manipur nung joint operations agidang prangpong 42 ngutet



Imphal, January 5, 2025 (Agencies): Indian Army-i Manipur Police aser tanga security agencies den külemi inyakdang prangpong-injang aika ngutetogo. Parnoki hill aser valley regions nung tesem balala mita

senzüdang prangpong 42 tashi ngutet. Imphal West, Chandel, Thoubal, Kangpokpi, aser Churachandpur district tem nung parnoki iba mapa inyaka liasü. Public asoshi lendong

bentsür arutsü ta asüba ajak noktangsü meranga sepaitemi akokba tashi mapa inyaka arudar. Manipur nung security forces-i hill aser valley districts kübok lendong ataloktsü ana nung aliba tesemtem nung operations agir.

Shillong nung gari mashii anishirtem indang licence agientsü

Guwahati, January 5, 2025 (Agencies): Meghalaya nung Shillong traffic police department-i gari mashii anishirtem indang driving licences agientsü mapa ka tenzükogo. Shillong nung gari mashii aniba ajanga nisungtem nem lendong bentsür arutsür aser iba

ya azüoktsü atema mapa tenzük. Police-isa registration shitak maliba den number plates maliba garitem mita aotsü tenzükogo. Gari nung registration plates maliba dang masü saka bikes nunga plates maliba ateam temerenshi agütsütsü ta police-

i metetdaksüogo. Shilling nung modified exhaust pipes noktanga lir saka police-i bike o gari modified loud pipes enokertem merenshitsü tenzükogo. Motor Vehicle Act, 1988 nung Section 182A (4)/190(2) kübok aibelenertem merenshitsü.

Governor Acharya-i Assam sorkar nem tenüngsang agütsür

Guwahati, January 5, 2025 (Agencies): Assam Governor Lakshman Acharya-i tawa tu Tinsukia semdang aser idangji ketdangsürtem den sendentem amen aser state nung terenlok mapa inyakba atema tenüngsang agütsü.

Governor Acharya-i Tinsukia Deputy Commissioner office nung senden ka ayonga amen. Governor Acharya-i osangbener den jembidang state sorkari terenlok bener arutsü atema mapa inyakba asoshi tenüngsang agütsüba metetdaksü.

Iba senden nung State Home Minister Rupesh Gowala, Tinsukia MLA Sanjay Kishan, Chabua MLA Punakon Baruah, Deputy Commissioner Swapnil Paul, Superintendent of Police Abhijit Gaurav Dilip, aser tanga departmental heads aden.

Cachar police-i Rs 3.2 crore jenjang alangba heroin apu



Guwahati, January 5, 2025 (Agencies): Cachar district kübok Kathal Road nung Assam police-i motorcycle ka soter mita repringdang heroin gram 635 bena aliba angu. Osang tejangja ka nung ajemdaker Cachar Police-i January 4 aonung Rs 3.2 crore alang heroin apu. Iba ya tanga state kati bener aotsüba liasü aser motorcycle nung mena aliba nisung puogo. Assam police-i 2024 nung Rs 682 crore tema alangba

drugs puogo aser maneni ozüng alema inyaksangshiba anema mapa inyaka arur. "Yaküm police-i heroin aser tanga drugs seret 183 tashi apu aser iba indang jenjang Rs 682.44 crore liasü" ta Assam Chief Minister Himanta Biswa Sarma-i State Guest House, Koinadhara nung osangbener den jembidang ashi. "2021 nung police-i Rs 420.17 crore alang drugs, 2022 nung Rs 784.55 crore alang, 2023 nung Rs 742.09 crore alang aser yaküm Rs 682.44

crore alang drugs puogo" ta CM Sarma-isa ashi. Assam police-i yaküm ganja seret 22,776, opium seret 114, psychotropic substance tablets 33.07 lakh, morphine seret 14 aser cough syrup bottles 2.30 lakh apu. Yaküm Assam police-i nisung 5059 apu aser ken o 3,287 tashi benoka liasü. 2021 nungi 2024 tashi Assam nung Child Marriage anema mapa inyaka arudang police-i nisung 5,978 apu aser ken o 6,361 tashi benoka lir.

ALI AYOKER

FOOTHILL LEMANG ANASA VIHOKHU NUNG ALILEPSA-AAYOKER. TALITSÜ KIMONG ATEMA TAJUNG ANUNGJI TALINUR TEMI IBA NUMBER NUNG CONTACT SÜANG. SQFT. NUNG 80/- DIRECT CONTACT : 6009530632 / 6009094225

**AFFIDAVIT
SELF DECLARATION**

Pangtisungla wife of JC 551136P Sub Lanuakum HQ/Coy. 17 Assam Regiiment, Pathankot - 91041\7, Punjab, C/o 56 APO, permanant resident of F.A.C Campus Vill. Chuchuyimpang Po. Mokokchung Dist. Mokokcbung 798601 Nagaland. Kü kinungtsü tenüung shidakba (Aadhar card aser PAN Card) atema kuli asoshi iba affidavit ya yanglur.

Tenüung Tejenba : Pangit Sunclaims
Tenüung Shidakba : PANGITSUNGLA

Biden-i Israel dangi sen \$8bn jenjang hadir yoktsü sentong lir



Washington, Aenjeti/ January 05 (Agencies): US Department of State ajanga Congress dang sen \$8 billion jenjang nok-nü Israel dang ayoktsü sentong lir ta metetdaksü.

Item hadir ayoktsü atema House aser Senate committee balala nungi temelaba nüngdaker, aser yangji missiles, shells aser danga hadir tem lir.

Tir Joe Biden-i office yutsütsü hopta ana dang lia iba mera ya agir. Gaza nung rara mapang civilian aika tepsetba mechi Israel yaria mitkar tsütsü teyari agütsüba anenang ta ayongzükba Washington-i magizük.

August ita nunga US-i Israel dang sen \$20 billion jenjang fighter jets aser danga military osettem ayoktsü temelaba agüja liasü.

Tang tesüsa ayoktsü sentong aliba nungya air-to-air missiles, Hellfire missiles, artillery shells aser bomb tem lir, ta US ketdangsür kati ashi.

“International law aser international humanitarian law den lirumedema Israel-i nüburtem kumzükba ayutsü aser Iran aser par proxy telok temi tashiyim amshiba nungi jenbua alitsü asoshi temeden lir ta tiri jangja-jangja shiogo,” ta ketdangsüri ashi.

“Onoki Israel indang defence atema nüngdakba tashi maneni agütsütsü.”

US-i Israel yariba ya ‘iron-clad’ lir ta Biden-i teti jembia arur.

Israel nem nok-nü agütsür rongnung US ya kanga agi tulutiba lir aser alima nung ‘technologically sophisticated militaries’ tematiba yangluba nung yaria lir.

2019 aser 2023 tsüngta Israel-i conventional arms

alizükba rong shilem 69 shi US indang lir ta Stockholm International Peace Research Institute (SIPRI) ajanga ashir.

Gaza south tsütsü Rafah yimti nung Israel-i ground operation tesashi agitsü ta bilema US-i 2024 küm May ita 2,000lb aser 500lb bomb tem yokba anena ataba US-i tejangja metetdaksü. Saka Washington nung Republicans aser Netanyahu nungeri Biden dang mepelai liasü. Iba sülen Biden-i tenokdangba shilem kar agiena yamaji tanaben meinyaker.

Tir menden nungi alutsü alisangi pa tenüung tetshidaktsütsü meranga hopta ishika tsüngta Biden administration ajanga mera aika agiba rongnung tang tesüsa nok-nü yoktsü aliba ya dena lir.

January 20, 2025 nü Biden-i White House metoktsüdang Israel dang nok-nü ayokba sentong ibai tatem asütsü amai lir.

US tir inyaksü shima alisang Donald Trump-i bendang lima nung rara tembangtsü, US shilem agiba ajemtsü indang taoba mapanga jembiogo.

Trump ya Israel yarir tesashi ka amai nokdaka lir, saka pai American tembar tem dang Gaza nung military operation yakta tembangtsü ajungshia arur.

Hamas teloki October 7, 2023 nü Israel south tsütsü amakdang nisung 1,200 shi tepseter ano nisung 251 pua bener aoba nung telangzüba agüja Israel-i iba telok samatsütsü nükjidong nung rara tenzük.

Tang tashinung Gaza nung nisung 45,580 dak tema tepsetogo, ta iba territory nung Hamas meyong health ministry ajanga ashir.

US-i agütsüba missiles khaloktsüba sülen Russia-i tayang kepzüksü nangzük

Moscow, Aenjeti/January 05 (Agencies): Arütsülen Belgorod region nung US-i agütsüba ATACMS missiles ti Ukraine-i khaloktsüba khazüka yokogo ta ashiba sülen Russia-i tayang kepzüksü nangzük.

“January 3 nü Ukrainian territory nungi Belgorod region nung US-i yangluba ATACMS operational-tactical missiles amshia amaktsü merang,” ta Russian Ministry of Defence ajanga Honibarnü ashi.

“Kyiv yimli ajanga iba ama mapa inyakba nung tayang kepzüksü, koba Western curators teyari lir,” ta ashi aser missiles ajak khazüka yok ta shisem.

Air defences ajanga ATACMS missiles ti khazüka yok ta ministry-i shia liasü saka kodang mesüra kong atalokar mashi.

Iba tai tongloktsüba atema

Ukraine nung ketdangsür temi telangzüba agüja mali.

Army Tactical Missile System (ATACMS) ya meta 300km (190 miles) tashi aor aser ibai mezüng 1980s nung yanglur.

US tir menden nungi alutsü alisang Joe Biden-i Kyiv dang Russia anema long-range weapons amshitsü taoba küm temelaba agüja lir, aser ibai küm asem jungnüa raraba tongpang tesashiba kumdaktsür ta Kremlin-i aitsü.

Biden-i ano anogo ishika tsüngta Ukraine asoshi security tsütsü teyari tali agütsütsü imlar, ta White House odongtar John Kirby-i ashi.

Taoba ita sensaksem ka nung US tir inyaksü shima alisang Donald Trump-ibo Ukraine-i item nok-nü amshitsü khenyongi memulunger ta shia liasü.

US nungi mitkar tsütsü teyari agütsüba den külemi ano Kyiv nem tan ita French Mirage 2000-5F multirole fighters mezüngbuba agütsütsü amai French magazine Avions Legendaires ajanga ashir.

Ukraine-i long-range Western weapons amshia Russian territory nung maneni makra Kyiv tiyong nung hypersonic ballistic missile amshia amaktsü, ta Russia Tir Vladimir Putin-i taoba küm amokmerena liasü.

Küm tenzükba sülen linük anaprongi civilian dak amaker ta kati ka dak tai tongloktsüteper.

2025 küm tenzükker mezüng anogo asem nung Russia-i attack drones 300 aser missile 20 khaloktsü, saka aika Kyiv sepaitemi khazüka yok, ta Ukraine Tir Volodymyr Zelenskyy-i ashi.

Taruba hopta nungi Damascus airport tanaben lapoktsü

Damascus, Aenjeti/January 5 (Agencies): Syria nung aliba Damascus airport nung Mongolbarnü nungi international tayimtsütem senzüsenpong tenzüksü. Taoba ita opposition teloktemi Bashar al-Assad atsüngtokba sülen iba airport inyaksangshi mesüi arur Mongolbarnü nungi tenzüksü.

Syria yimtiba nung Assad pusemba sepaitemi December 8 nü iba airport toktsüba sülen tang tashi nung tayimtsü ka danga iba airport nungi apusoa mao mesüra anena mali.

“Mongolbarnü nü nungi tenzükba Damascus International Airport nung international tayimtsü agizüksü aser apusotsü,” ta General Authority of Civil Aviation and Air Transport tekolakba Ashhad al-Salibi-i ashiba state news agency SANA-i sangdong ka ajanga metetdaksü.

“Alima ajunga nungi tayimtsütem agizüksü atema onok partner tem teyari agia onoki Aleppo aser Damascus airport yanglushi tenzükogo ta Arab aser international airlines tem nem onok tenangzükba agütsür,” ta paisa shisem.

Damascus nungi Al Jazeera osangbener Hashim Ahelbarra-i ashiba agi, “administration tassenbai parnok meketa aliba linük aser talisa Qatar den Damascus nung parnok indang airport ya international safety standards tongteta yanglushitsü atema teyari nüngdakba lemsatepogo,” ta ashi.

“Parnoki Syria nung akhi ama tensa junga kümogo ta osang ka agütsüner aser iba den bendanglen aliba Syria nungertem kidangi meyipa arudaktsüner. Tensa mejungi liaka administration tassenbai

“Alima ajunga nungi tayimtsütem agizüksü atema onok partner tem teyari agia onoki Aleppo aser Damascus airport yanglushi tenzükogo ta Arab aser international airlines tem nem onok tenangzükba agütsür,” ta paisa shisem.

Damascus nungi Al Jazeera osangbener Hashim Ahelbarra-i ashiba agi, “administration tassenbai parnok meketa aliba linük aser talisa Qatar den Damascus nung parnok indang airport ya international safety standards tongteta yanglushitsü atema teyari nüngdakba lemsatepogo,” ta ashi.

“Parnoki Syria nung akhi ama tensa junga kümogo ta osang ka agütsüner aser iba den bendanglen aliba Syria nungertem kidangi meyipa arudaktsüner. Tensa mejungi liaka administration tassenbai

Syria kübok tesem balala nung tekümzükba maparen balala benoka inyakdar ta alima kintem nem metetdaksüner,” ta paisa shisem.

Teyari agütsüba international tayimtsü balala aser bendanger lenirtem Syria-i aru tenzükogo. Domestic flights inyakyimbo December 18 nü nungi tenzükba liasü, ta AFP news agency-i metetdaksü.

Syrian Airlines ya Mongolbarnü nungi tenzükba Damascus nungi United Arab Emirates kübok Dubai-i ao tenzüksü, ta ken o jangja alir kati AFP dang ashi.

Brehostibarnü Qatar Airways-i, küm 13 shi lir parnoki Syria yimtiba-i tayimtsütem yok tenzüksü, ta metetdaksüogo. Mongolbarnü nungi tenzükba hopta nung tayimtsü asemsem yoktsü.

War operations room ka nung Hezbollah lenir Nasrallah tepset

Beirut, Aenjeti/January 5 (Agencies): Hezbollah lenir Hassan Nasrallah, taoba küm Israeli anüng ajanga amakba mapang par telok indang war operations room ka nung tepseta liasü, ta Hezbollah ketdangsür tejen kati Deobarnü metetdaksü.

Israel-i September 27 nü anüng ajanga amakba sülen Beirut indang southern suburbs nung ki aika ajasaja liasü aser iba mapang Nasrallah tepset. Lebanese Health Ministry-i ashiba agi, iba lendong nung nisung trok asü. Osang ajanga ashiba agi, Nasrallah aser tanga ketdangsürtem ali telung nung senden mena liasü.

Nasrallah, shibai Hezbollah telok küm 32 tashi len ania

aruogo, pa tepsetba ajanga Israel aser Hezbollah na ita aika tanem tanemi raratepa arua aliba ya rara tulu ka aküm aser US teyongtsüi ia ceasefire mebenok tsüngda southern aser eastern Lebanon kanga mejungi raksatsüogo.

“Hassan Nasrallah-i pa aliba tesem nungi rara ania liasü,” ta Hezbollah security ketdangsür Wafiq Safa-i Deobarnü Nasrallah tepsetba tesem anasa osangbenertem den sensaksemba mapang ashi. Pai ashiba agi, Nasrallah ya war operations room nung asü.

Ceasefire mezüngbuba shilem nung Hezbollah puri parnok sepa, prangbong injang aser infrastructure tem Litani ayong north len southern Lebanon nungi anintsüla aser

kasa mapang nung Israel nunger sepaitem shinoki southern Lebanon maka liasü parnok anogo 60 tsüngda ainshitsüla.

Southern Lebanon nung Lebanese army sepaitem aser United Nations peacekeepers tem dang alitsüla.

Israel nunger sepaitem parnoki azüoka aliba tesem kar nungi dang atsünginba atema Lebanon aser Hezbollah nati aija arudar. Kasa mapang nung Israel-i ashiba agi, Lebanon military-i Hezbollah pur indang infrastructure tem matongsatsüi lir.

Hezbollah lenir Naim Kassem-i Honibarnü ashiba agi, iba ita tatem tashi nung Israel nunger sepaitem mainshira parnoki amaktsü akok.

Ind vs Aus: Australia-i wicket 6 agi tatembangbuba Test kokogo

Aenjeti/January 5, 2025 (Agencies): Sydney nung pongububa aser tatembangbuba Test asaya tasemnübuba Australia-i wicket trok agi India koka parnoki iba asayamung 3-1 agi kokogo.

Australia nunger bowler tem rongnung Scott Boland-i ball kanga junga ona pai run 45 agütsür wicket 6 agi. India team-i tasemnübuba run 16 dang yangluteta parnoki run 157 yanglur asayar ajak out süatok.

Captain Jasprit Bumrah yiruba ajanga masayatetaka India nunger asayartemi lunch matong tsüngda wicket asem agi, saka Travis Head aser Beau Webster nati kanga junga asaya-a parnoki over 27 nung dang run 162 ya menepa Border-Gavaskar Trophy kokogo.

Iba asaya akokba sülen Pat Cummins-i aniba team ya World

Test Championship final atema qualify süogo aser parnok June ita Lords nung South Africa den asayatsü.

Run arishiba mapang opener Sam Konstas-i ball 17 nung run 22 yanglu, saka pa Prasad Krishna-i out sütsü. Iba sülen Marnus Labuschagne aser Steve Smith nata kanga kara out süatok aser iba mapang parnoki run 58 dang yanglur liasü.

Smith run pezü dang yanglur out süatokba sülen pai Test asaya nung run 10,000 run ka agi dang metongteti liasü. Ajisüaka Head aser Webster nati run 58 yanglua parnoki asaya akok. Tatembangbuba run ya Washington Sundar-i ball aoba mapang Webster-i züka liasü.

Iba asaya nung Boland-i Australia atema kanga junga asayaogo. Tananbuba Rishabh

Pant-i kanga kara run 61 yangluba sülen Australia team jenjang mejungi kümdaktsür liasü saka Boland-i ball kanga junga ona Australia-i asaya azüoktsü atema teyari agüja liasü.

Arishi küm 35 tain asayar yagi India nunger innings nung tatembangbuba wicket agia pai iba asaya nung wicket 10 agia liasü.

Iba asaya nung all-rounder Webster-a mezüngbuba asaya aser paia kanga junga asayaogo. Pai mezüngbuba innings nung run 57 yanglu aser tanabuba innings nung out mesüi run 39 yanglua liasü. Paisa wicket ka agi aser catch ana süa liasü.

Kasa mapang nung Player of the Series Bumrah yiruba ajanga India team tashi meiti aküm. Pai Test pongu nung wicket 35 agiogo.

Naomi Osaka yirur masayatetsüsa aküm

Aenjeti/January 5, 2025 (Agencies): Naomi Osaka Deobarnü Auckland Classic final asayaba mapang abdomen yiruba sülen asaya tembanga masayateti tuguatok.

Australian Open asayatsü hopta ka dang anunga lia la tang yiruba ya la asoshi tetsükdaktsü tulu asütsü.

Küm asem tsüngda mezüngbuba WTA final Denmark tsür Clara Tauson den asayaba mapang, Grand Slam pezü tashi koker alila yagi mezüngbuba set 6-4 agi akokba sülen physio jaok aser iba sülen mapang tatsüka dang lir masayateti tuguatok.

Osaka ajungbena iba Australian Open warm-up asayamung nungi tuguatokba ya taoksatsüka liasü, kechiyong la mezüngbuba set asayaba mapangbo la timtemba merprangtet aser lai shot tajung aika asaya-a Tauson indang service game anaben break süa liasü.

Court melenteba mapang arishi küm 27 tain asayar yagi nokdaker la temang stretch süa liasü.

La indang trainer den sensak asema sülen lai Tauson den oa salem asü aser tuguatok. Tauson-i iba

asayamung akokba densema la indang career nung title asemububa benogo.

Courtside nung interview tatsüka agiba mapang Osaka-i la kechiba masayatsüsa aküm iba indang osang tejangja magütsü.

Ajisüaka WTA-i sangdong ka ajanga ashiba agi, la abdomen yiruba ajanga masayatetsüsa aküm.

“Iba yimti tebor tajungi ni pelashishia agizükba atema ajak dang kanga pelar aser ni iba tesem nung jangradema asayaogo aser tatembang mazü tembangba atema tai tokang,” ta Osaka-i ashi.

“Onok asayaba nenoka jangradema repranger alitsü imlar aser ni idaki asayatetba atema kanga pelar,” ta laisa shisem.

2021 Australian Open akokba sülen Osaka küm pezü tsüngda tang mezüngbuba final nung shilem agi saka tatembang mazü tembangogo.

La tesüsa final asayabaji 2022 küm Miami Open nung asayaba liasü aser iba sülen la tanur soa bentsütsü atema ita 15 masayai liasü.

La ita 12 tejakdang asayashi tenzükogo aser world rankings nung jenjang 57bubai tuogo.

Sabalenka-i Kudermetova koka Brisbane title benogo



Aenjeti/January 5, 2025 (Agencies): World number one Aryna Sabalenka Australian Open nung la indang title defend asütsü atema asayaba mapang Brisbane International final nung lai Russia tsür qualifier Polina Kudermetova kokogo.

Arishi küm 26 tain Belarus

tsür la yagi final asaya nung mezüngbuba set nung la indang service game ana tashi break südakja makokba sülen asaya 4-6 6-3 6-2 agi koka liasü.

Sabalenka taoba küm Brisbane final nung Elena Rybakina-i tsükdaktsü, ajisüaka lai iba sülen Australian Open

küm anabuba atonga koka liasü.

Taküm atema mezüngbuba Grand Slam Melbourne Park nung January 12 nü nungi tenzüka asayatsü.

Mezüngbuba set junga masayatetba sülen Sabalenka-i tanabuba set kanga tashi ita asaya tenzük aser Kudermetova-i la indang mezüngbuba service game nung break point ishika kümzüksüsa aküm.

Iba sülen Sabalenka-i Kudermetova indang serve break asü aser la 3-2 agi tejakdang akümba sülen set koka decider asayatsüsa aküm.

Tasembuba set nunga Sabalenka-i kanga kara service ka break asü aser iba sülen lai asaya azüoka asaya-a taküm mezüngbuba asayamung koka liasü.

Saisapongtsü sempet aketer anitetsü meranger: Indian Army

Aenjeti/January 05, 2025 (Agencies): Linük nung saisapong sempet balala atema sorkari asayartem tenüng sangdongba sülen Hokulbarnü Indian Armyajanga alima nung saisapongba sapang nung linük temaba jenjangi anir aotsü atema saisapong nung sempet aketer anitetsü meranga inyaker ta ashi.

Social media X nung Army ajanga Paris Paralympics 2024 nung bronze medallist Subedar Hokato H Sema aser Naik Gajendra Singh kinungtsü Simran nunger Arjuna Awardees tem rongnung densemba asoshi tenüngsang agüja liasü.

Olympic medal ana angula Manu Bhaker aser chess world champion D Gukes na

Major Dhayan Chand Khel Ratna award angur nisung pezü rongnung densema lir, koba Sports Ministry ajanga Brehostibarnü sangdonga liasü. Arjuna sempet angur nisung 32 rongnung para-athletes 17 dena lir, shirnoki Paris Paralympics nung takok tulu ngua liasü.

“Paris Paralympics 2024 nung Sitting Shotgun (F-57 category) nung bronze medal angusang Subedar Hokato H Sema-i Para Asian Games 2022 nunga bronze angu aser para national silver medals asemben ngua lir,” ta Army-i iba post nung zülutsü.

Simran-i tetsür 200m (T-12 category) nung bronze medal angu aser Paris Paralympics 2024 nung tetsür 100m (T-12)

nung pezü buba jenjang tongtet. Lai World Para Championship nung kasa category nung Gold Medal ngua lir aser 100m aser 200m nung Para national golds ngua lir.

“Parnoki anibelen mesasai bendanga agütsür inyakba ajanga takok tulu nguteta linük dangi konang-nüngsang bener arutsü aser dangar aika timtem balala liaka tajungtiba akumtsü ajungmeso. Indian Army-i global sporting arena nung linük takok nung anitsü asoshi saisapong nung sempet alirtem anitetsü meranger,” ta ashi.

Sports Ministry ajanga ashiba agi, item sempet ya January 17 nü Rashtrapati Bhavan nung sentong balaka ayongzüka India tir ket nungi agizüktsü.

Spurs-i goalkeeper Kinsky pound million 12.5 agi alizükogo



Aenjeti/January 5, 2025 (Agencies): Tottenham-i arishi küm 21 tain Czech nunger goalkeeper Antonin Kinsky Slavia Prague nungi alizükogo. Kinsky ya pound million 12.5 agi alizüka liasü.

First-choice keeper Guglielmo Vicario November 24 nü Manchester City goal 4-0 agi akokba asaya nung yiruba sülen masayateti arudar.

Vicario melena Fraser Forster goalkeeper mena aruogo, ajisüaka pa-a Honibarnü goal 2-1 agi Newcastle makokba asaya nung shirangba ajanga masayatet aser ibayongji arishi küm 25 tain Brandon Austin

mena liasü.

Spurs puri Premier League nung taoba asaya 11 nung asaya ana dang koka lir aser parnok tang jenjang 12buba nung lir.

Kinsky-i 2031 küm tashi club nungi asayatsü atema mulunga agizükogo, ajisüaka pa international clearance aser work permit ka nungdaker.

2021 küm Dukla Prague nungi oa Slavia Prague nung adenba sülen pa loan nung oa team balala nung asaya aser iba sülen Slavia nung amenoka liasü. Czech Republic nunger Under-21 asayar ya taküm Slavia nungi 29 ben asayaogo aser asaya 14 tashi nung pai goal ka danga mechi-i asayatetogo.

BILEMDANGANG

“Shibai asüngdang,
pai lemag kodanga maier.”